

## მგზავრის სიმღერა

რამდენ მდინარეს არბევს  
ეს დატეხილი მთები,  
დემონისას ჰგავს წარბებს  
მძლავრი ნიაღვრის ფრთები.

სუნთქვა მაღლიდან მორბის,  
როგორც ქარული რაში,  
და ბუდეები ორბის  
მიჯგუფებულა მთაში.

უუძველესი ციხის  
ჩანს ნანგრევები შორი,  
ჩქარი მდინარის რიყეს  
რგოლებს აზომებს ქორი.  
დგება საღამო ჟამი,  
მთებს ეპარება რული,  
ჩქარა დაეშვი, ღამე,  
და დამიმშვიდე გული.

ჩქარა დაეშვი, ბინდო,  
ფიქრი მომეცი წმინდა,  
ვისაც ვენდე და მინდო,  
კვლავ მომაგონდეს, მინდა.

მინდა ახალი გზები,  
მინდა ახალი რამე,  
გაბრწყინებული მთები,  
განათებული ღამე!